

四庫全書

子部

欽定四庫全書

子部

續名醫類案卷四十五

詳校官入醫院醫官臣姜晟

編修臣倉聖脉覆勘

總校官編修臣王燕緒

校對官中書臣劉源溥

謄錄監生臣陳箴

欽定四庫全書

續名醫類案卷四十四

錢塘魏之琇撰

小兒

傷寒

喻嘉言治袁仲卿子因捉蜚蜊仆水中家人救出少頃
大熱呻吟或與鎮驚清熱丸散二日遂昏迷不醒胸
高三寸頸軟頭傾氣垂絕無生理矣診其脉止存蛛
絲過指全無以湯二匙入口微有吞意曰外症之重

不懼但脉已無根不可救也一醫曰鼻如烟煤肺氣已絕縱有神丹亦將奈何因思此兒受症何至此極

請主人及客稍遠待某一人獨坐靜籌其故

病危之家親賓

滿座議論紛紜徒亂人意不可不知

良久曰得之矣凡驚風一症乃前

人鑿空妄談後之小兒受其害者不知凡幾昔與幼

科爭論殊無証據後見方中行傷寒條辨後附痘書

一冊頗言其事始知昔賢先得我心如此症因驚而

得其實跌仆水中感冷濕之氣為外感發熱之病其

食物在胃中者因而而不化當此夾食傷寒例用五積散治之醫者不明以金石冷藥鎮墜外邪深入臟腑神識因而不清其食停胃中者得寒涼而不運所進之藥皆在胃口之上不能透入

何以云鎮墜深入臟腑

轉積轉

多以致胸高而突宜以理中藥運轉前藥倘得症減脉出再用傷寒藥尚有生理或謂鼻如烟煤肺氣已絕而用理中得毋重其絕乎曰所以獨坐沈思者正為此耳蓋烟煤不過大腸燥結之徵若果肺絕當汗

出大喘何得身熱無汗又何得胸高而氣不逼且鼻
準有微潤耶此所以望其生也遂以理中湯一盞灌
入喉中大爆一口前藥一齊俱出胸突頓平頸亦稍
硬但脉仍不出人亦不甦此食尚未動闕竅阻塞之
故再灌前藥些少熱漸退症漸減乃從傷寒下例以
元明粉一味化水連灌三次是夜下黑矢甚多次早
忽言一聲云我要酒喫此後尚不知人事以生津藥
頻灌一日而甦

龔子才治一小兒八歲患傷寒頭痛身疼發熱口乾面赤無汗或以傷寒治之不效已旬日與龍腦安神丸一服其汗如雨即安

一小兒沈默昏倦肢冷驚悸其紋如弓之向裡此屬胃氣虛而外感寒邪也先用惺惺散以解外邪諸症悉愈但手足逆冷又用六君子調補元氣而安

一小兒傷寒嘔吐發熱面赤白消導清熱之劑飲食已消熱未退用六君升麻柴胡四劑而痊

高鼓峰治吳維師子甫十歲發熱口渴胸腹悶痛曰少
陽陽明症也用加味小柴胡湯是夜發暈逾一二時
吳驚甚曰無傷也但此病不傳瘡不傳痢逾三日熱
退果小腹痛先解黑矢無數隨後便膿血而痢矣連
用當歸解毒湯五六劑而痢除繼以六君子湯調理
而安

馬元儀治張伯卿子年十二患傷寒譫語發熱不知人
事已五六日幼科屢治不應漸至目直神昏診之兩

脉弦急拒指因驚後飲食與痰留結不解壅遏為病
胃氣生熱津液內亡而譏語陽明之脉絡於目經盛
則絡亦盛故目直視也實熱在胃惟用承氣以調之
使壅滯之氣悉反沖和則津液存得而病自去矣加
服抱龍丸以豁痰治驚服後便行二三次熱勢大減
明日全愈

蔣仲芳治陳受伯弟年十一歲傷寒病起幾至二百日
粒米不入食即脹滿諸藥不愈惟日以人參三錢煎

飲而已視之骨瘦如柴六脉沈細似宜參朮然按其
心胸小腹硬塊已滿著手即痛曰憑脉則難以下藥
不下亦無生理遂用當歸元明粉各三錢酒蒸大黃
二錢杏仁麻仁蘇子桃仁俱炒為末各一錢白芍川
芎桔梗各七分水煎服服後即去黑塊二三十中脘
硬處下有寸許然已虛極明日去大黃元明粉加人
參二錢服一劑後日復用首方又去黑塊一二十二
方間服半月黑塊始盡而愈

小兒感症

總制石公子年甫十齡丁丑六月患感冒風暑寒熱頭
疼幼科已用葛根加羌防解表矣後復寒熱不減氣
喘腹脹醫者用消導加小柴胡湯不應神昏喘急時
或泄瀉似痢腹痛不知名為何疾也診之已二十餘
日脉數無力神氣昏亂按其腹時痛時脹觀其神時
靜時躁手足或冷或熱虛汗不已此外邪初感者為
藥而解久積者未曾清理加之飲食失調元氣欲脫

致外邪內陷今以救本為急用理中湯加桂附痛瀉
頓減手足亦溫然熱不退小便赤澀用金匱腎氣湯
二服小便方利而寒熱愈加此元氣漸因症候復現
也朝用六君子湯加柴葛神麴乾薑夜用六味湯加
參桂旬日後寒冷拘攣目上竄咬牙呻吟咸以為無
救矣陳曰此名寒戰正氣將回積邪欲出乃吉兆也
自未至酉始大汗如雨手足軟怠不語熟睡天明方
能言然虛症日出潮熱汗多則用補中湯合建中加

附子不寐則用歸脾湯元氣弱則用十全大補湯腹痛滑瀉則用理中六君湯如是調理三月方瘳

蔣仲芳治一小兒在水閣風雨率至又驚又寒後四肢厥冷漸至遍身惟心口稍暖此冷風入骨症也冷至心窩則死用理中湯加附子一錢數服而寒始退

聶久吾治司理毛具次子年十一夜間忽發大熱頭痛身又痛咸以為病暑也及問其由細察其脉乃感寒耳謂必須發汗其家以現在多汗為疑曰此汗不

當數必用藥發汗方可除病遂與一大劑令其熱服出汗至天明諸症盡退再與清解數服而安羌防各六分陳草各三分芎芷各四錢赤芍五分香薷乾葛各一錢二分蒼朮蘇葉香附各八分薑三片

小兒傷風

薛立齋治一小兒傷風咳嗽發熱服解表之劑更加喘促出汗以為脾肺氣虛欲用補中益氣湯加五味子補之不信乃服二陳桑皮杏仁枳桔之劑前症益甚

又加發搐痰壅仍用前方加釣藤鉤而痊

陳文中治太師賈平章子宣機三歲頭熱目赤痰齁不
已一醫言風熱盛痰涎作陳曰因脾肺虛而風冷寒
痰所作又一醫言熱即生風冷即生氣陳曰不然三
冬盛寒冷則生風九夏炎熱熱則生氣蓋風者百病
之長也若寒得之而謂之風寒若熱得之而謂之風
熱若燥得之而謂之風燥若濕得之而謂之風濕此
非獨熱而生風也如暗風破傷風臍風慢驚風及風

痼驚痼食痼等症而皆作搐非但熱而生風也宣機
病始於頭熱目赤便以涼藥餌之致寒涼氣客於喉
厭之間與津液相搏又生痰麁症其喉厭寒痰冷氣
壅塞不通故頭熱目赤無由得愈治法當幹去喉厭
間寒痰令氣得通其病可愈遂投芎蝎散一服用手
幹去寒痰冷涎四五口次以油珠膏一服而愈

病源
方論

曾世榮治衡州萬戶張侯寓屯田日長子三歲六月得
患不語手足痿縮已經二旬曾至諸醫議論不一觀

外形面垢有熱氣促流涎口眼喎斜不省人事次則手足俱冷而痿縮身背反張診六脉沈按而緊獨心肝脉虛而細數餘脉緩弱曰面垢色脉細數此因中暑感風前賢所謂暑風者是也手足冷縮而不伸或服涼劑太過寒之使然若手足溫其效自速乃以治暑法分陰陽順中氣玉苓散加寬氣飲薑汁沸湯調下三服其症稍慢次疎風和榮衛百解散加荊芥人參當歸水薑煎投隨以溫灰湯澆洗手足藥一服洗

一次至八九次手足溫則血活活則筋舒舒則手足運動如常餘熱未除消暑清心飲主之聲音不全二聖散取效調理惟用萬安飲恰九日前症俱減張侯曰此子更生端藉藥力不敢忘也因筆漫記後有是症仿此活人亦方便心矣

立齋治一小兒傷風鼻塞流涕服藥過重發搐呵欠頓悶汗出氣喘久不愈其母因勞役發熱用補中益氣湯時以五七滴與兒飲之母子並愈

一小兒傷風發搐痰盛喘急謂此脾肺氣虛腠理不密而外邪所乘用六君加柴胡升麻桑皮杏仁一劑痰喘悉退又一劑去桑杏加鉤藤而安乃用異功散數劑不復發此症若不補脾胃實腠理端治痰邪鮮有不誤

小兒暑

繆仲淳治高存之次子童時夏月身熱十晝夜止飲白湯諸醫汗之不解以麻仁丸下之熱如故繆診曰此

傷暑也白虎湯是其本方因誤汗下虛甚加人參三錢一劑微汗瞑眩少頃熱解更疏一方防其瘡痢仍用人參二錢兼健脾清暑導滯之劑未幾瘡作如方飲之瘡止痢又作存之不得已於生脉散中加益元散飲之兒疳羸甚謂數日後死矣仲淳復至語之故曰生脉益元散得之矣不診而諦視兒問糜甘否曰甘大呼曰病去矣存之問故曰視兒目光炯炯且飲食味甘是精神已王胃氣轉矣尋果脫然起

臧玉涵子歲半盛夏咳嗽七日因浴受驚又傷食大熱
俸頓三日不敢與藥目翳唇繭舌乾仲淳曰此暑病
也當與白虎湯曰腹瀉石膏無害乎曰先以天水散
探之服二錢少頃藥夾痰而吐微汗身涼黃昏復熱
又以天水散二錢不效仲淳曰其為暑症無疑當以
白虎湯加人參因兒患肺熱且止再診之曰暑邪客
於皮膚分內有熱無寒是為瘧瘧斷當用白虎湯連
服二劑不效鼻露眼開口不納氣勢甚危曰此正氣

不足勝邪也刺瘡論云凡瘡先時一食頃乃可治過時則失之也又云無刺熇熇之熱無刺渾渾之脉無刺漉漉之汗意者服藥不得時耶將前藥并劑煎露一宿雞鳴溫服之病頃失不須調補精神漸復以此知察病望氣及服藥之貴及時也

蔣子宮第五子一歲傷暑發熱服此藥

驚風之劑

十餘日驚

搐幾殆又進蠟丸等死去矣予察其悞中於藥以補

脾湯加減治之立愈

慈幼
寶

小兒傷食

陸道先治一兒多食果腹脹醫罔效光取桂麝瑞香三

味為丸服之立愈

平湖縣志

龔子才治一小兒食粽後咬牙欲吐頃間腹脹昏憤鼻
青黃赤此脾土傷而心肝動食積發厥也先令雞翎
探吐出酸物頓醒節其飲食勿藥而愈

一小兒好喫粽成腹脹痛用白酒麴末同黃連末為丸
服之而愈

一小兒因停食脹痛服峻利藥後患瘡日晡而作此元氣下陷以補中益氣湯治之愈

高鼓峰治吳章成弟八歲發熱悶亂大便不通醫作感

冒治高曰此得之傷食因發散太過遂成虛熱兼風

藥燥血故不便耳

名言當玩

先以六味飲加肉從蓉三錢

飲之下黑矢數十枚繼以補中益氣湯數劑而諸症

悉除

薛立齋治一小兒傷食發熱面赤或用養胃湯枳實黃

連山查治之更加腹脹午後發熱按其腹不痛此飲食雖化脾胃復傷用六君子湯數劑而愈

一小兒傷食發熱嘔吐面赤服消導清熱之劑飲食已消熱赤如故曰此胃經虛熱耳用四君子湯加升麻柴胡各二分四劑而痊

一小兒傷食發熱面赤抽搐嘔吐氣喘吐痰以飲食傷脾發熱肺氣虛弱所致耳用六君子湯加炒黑黃連山梔各二分四劑而痊

一小兒飲食停滯服消導之劑曰此脾胃氣虛不能剋
化也法當調補為善若數用剋伐之劑脾氣益傷飲
食愈停矣已而腹內人結一塊寒熱潮熱食少作惡
大便不實用四君子湯飲食漸增又用補中益氣湯
而愈

萬密齋治孫監司女病後誤食菱角傷脾面腫而喘用
錢氏異功散加藿香葉以去脾經之濕紫蘇葉以去
肺經之風一劑而安

外甥女有食積脾虛病痘後又傷食甚瘦腹脹不喜食
用胃苓丸方加枳實炒神麴麥芽青皮作丸服之
一兒因傷食腹痛脹醫下之而愈又傷食腹脹醫再下
之曰非其治也誤殺此兒果半年而死或問故曰凡
飽食傷胃而脹宜消導之脾虛不能消食而脹宜補
之以助其傳化醫者不察乃一下再下致腹大無紋
臍突背平脾腎皆傷不死何待

王閑一子周歲因食猪肉受傷肢體瘦削使人求藥問

其詳乃食積痞此有餘病也與脾積凡五粒教以猪肉湯吞之果下一塊如小指大涎沫裹之而出頓安馬銘鞠治華氏子連食冷鴨子二枚午間又縱恣飲食更餘病發上不吐下不瀉胸腹脹滿目閉氣喘身熱按其胸腹則雙手來護曰食也鴨子黃閉氣得水則化今尚在胃口急索大棗數枚煎湯入砂仁錢許以通其氣兒渴頓飲挽許氣漸通目開手足亦漸流動再煎飲之夜半吐瀉交作次日勿藥而愈

立齋治楊錦衣子十歲腹脹痛服消導藥不應彼以為
毒請診其脉右關沈伏此食積也河間云食入即吐
胃脘痛更兼身體痛難移腹脹善噫舌本強得後與
氣快然衰皆脾病也審之果因食粽得此以白酒麴
熱酒服而愈

張子和曰舞水一富家有二子長者年十三幼者年十
一好頓食紫櫻一二斤每歲須食半月後一二年幼
者發肺癰長者發肺痿相繼而死張常歎曰人之死

生命耶天耶古人有詩爽口味多終作疾真格言也
天生百果所以養人非欲害人然富貴之家失教縱
欲遂至於是

吳振公次女四歲傷食吐瀉發熱發顫予謂此女多食
瓜果致藏氣不行釀成濕熱既經吐瀉濕去熱留藏
府之中無陰相養故變成風象為定參朮半夏砂仁
乾薑厚朴歸苓一方某醫謂弱齡女子豈得服參朮
遂易他藥服至五日人事昏沈頭徧睛露復延治以

溫中補脾救之立甦

慈幼
筏

小兒受驚

竇材治一小兒因觀神戲受驚時時悲啼不食如醉已
九十日危甚令灸巨闕穴五十壯即知人事曰適間
心上有如火滾下即好服鎮心丸而愈

萬密齋治一小兒年五歲夢中驚哭抱其母叫怕此因
被驚嚇得之為製一方用人參麥冬茯神黃連棗仁
柏子仁炙甘草為末山藥粉糊丸黍米大每服二十

五九燈草湯下未盡劑而安

龔子才治一小兒五歲因看會見裝鬼臉被驚嚇兩眼
黑睛翻向裡白睛翻向外視物微覺一綫諸醫束手
龔視之曰此兒曾出痘疹否對曰未曰俟出痘疹可
治逾月痘疹盛行其兒似有將出之機因延治以綿
胭脂水泡出汁慢火熬成膏塗兒兩眼胞上下一日
塗兩次直致痘疹靨後其眼復舊未嘗發明其故

吳孚先治一小兒先天薄弱膽氣甚小六歲時在塾中

見師以戒方在渠背後責同學生驚而受病不時驚
叫叫必左脚提起震地一聲五六年矣百治不效吳
曰肝喜驚呼肝氣虧損極矣然腎為肝母心為肝子
用補肝腎并鎮心安神之藥五十餘劑九藥三料而
愈

楊士瀛云小兒口噤不開猪乳飲之良月內胎驚用硃
砂牛乳少許抹口中甚妙此法諸家方書未知用予
傳之東宮吳觀察子病此用之有效

本草
綱目

馮楚瞻治張氏兒周歲卧低炕睡中墜下毫無傷損嘻
笑如故但自後右手足攤軟不舉手不能握足不能
立脉則洪大久按無力知為先天不足復於腫中驚
觸氣血不周行之故與熟地四錢麥冬一錢五分炒
白朮二錢四分牛膝二錢五味子四分製附子五分
煎小半鍾入人參汁二三分沖服六劑手足輕強精
神更倍

陸養愚治陳雲谷子年十四四月終自館中歸偶戲水

旁一人在後曰師來也因驚仆水頭面俱濕回家夜間身熱頭痛至晨煩躁不安胡言亂語及問之欲言而不能出聲或謂六脉浮緊此傷寒也表氣鬱冒致裡氣不舒故煩亂宜大汗之用五積散令密室重覆汗出透衾明日手足搐搦項背強直氣出不納自汗不語又投抱龍丸鈎藤散不效脉之兩寸浮數而散闊尺沈弱而瀉此因驚恐肝腎受傷經曰驚則氣亂胡言亂語氣亂故也語不能出者氣下故也初時以

平肝鎮心之中少佐以壯氣血之品病當自愈乃誤
為傷寒大發其汗汗多則亡陽變而為瘕強直搖擗
益瘕症也經曰陽氣者精則養神柔則養筋今陽氣
竭血無所附以養筋故不柔和也陽氣盡浮於外故
氣不納而自汗不語急用大料參芪為君以救垂絕
之陽四物為臣入天麻以養肝經之血棗仁五味為
佐以收耗散之神甘草麥冬為使以徹浮遊之火二
劑頓減復以硃砂安神丸間服旬日而安

萬密齋治胡鳳厓子痘後傷食成疳肌瘦髮穗一醫治
之已效別生一病似癰非癰晝則安靜夜則夢寐間
抱其乳母叫云我怕我怕如人捕之之狀詢其由兒
性畏藥醫來灌服必將針火恐嚇之蓋恐則傷腎又
腎藏志虛則神志不寧而生驚寤則神栖於心寐則
神栖於腎脾為往來出入之門戶以補脾為主安神
次之補脾肥兒丸安神丸調理半年而安

英山大尹吳清溪子病驚風皆作風治之不效曰非風

也乃因驚得之風從肝治驚從心治不識病原如何有效乃取至聖保命丹治之搐止矣

馬元儀治一童子讀書見其師因恐致病從朔日起昏憤不知人事七日乃甦羣作驚治延久不瘥曰此恐也非驚也或問驚恐何以別之曰驚從外來恐從內驚則傷心恐則傷腎腎傷於恐真水受虧龍火泛越擾亂神明復遇朔日謂之重陽真陰更為之困至七日而陰氣來復然後龍歸窟宅如風雲散而天氣清

明也治宜壯水之主以鎮陽先以六味地黃湯補其真陰加遠志以通神明肉桂導龍火歸源服此後竟不作

小兒驚風

萬密齋治徐道淑子病驚風先請張醫治之不效萬至病已七日發搐無時痰鳴氣急勢甚危按治驚之法先降其痰次止其搐後補其虛一言以蔽之惟治其火而已乃用河間涼膈散改朴硝為馬牙硝水煎成

湯入青礞石末調服之痰下喘止隨用瀉青丸導赤散二方相合作湯服之而搐止餘熱未除張主小柴胡湯竹葉湯涼驚丸皆不然之乃用四君子湯加炒黑乾薑一服身涼徐問故曰大凡小兒肝常有餘脾常不足肝主風搐搦氣逆皆屬於肝經曰太過則乘其所勝而侮所不勝故肝木旺則乘脾土侮肺金夫肝火名曰龍雷水不能制寒不能勝故以炒乾薑合參朮甘草之甘溫以補為瀉而愈也

按治法仍以寒涼折其標以甘溫固其本若據後半云云豈不打成兩極

汪元津子年五歲傷食成瘧瘧後發搐乃脾虛病也萬曰凡治驚風必用瀉青丸導赤散雖良工不能廢其繩墨也今此症不可瀉宜用調元湯琥珀抱龍丸如言服之而搐止但目不能開昏昏喜睡蓋脾虛極矣脾主困故喜睡目之上下胞屬脾脾虛故不能開也仍以調元湯補其虛琥珀抱龍丸安其神脾喜樂命

平日所與作伴嬉戲者環列牀前取鼓鉦諸器擊之
或歌或舞以引之

設法亦善

病兒之目乍開乍閉以漸而

甦不喜睡矣

羅田令朱女未周歲病驚風萬用瀉青丸是丸治驚風
之秘方也服之不效而搖轉甚蓋喉間有痰藥未頗
粗為頑痰裹住黏滯不行之故乃煎作湯用薄綿紙
濾去滓一服而愈

羅田曾教諭子病驚風先請一醫繼召萬同治醫主小

續命湯多辛燥之藥必反助火邪而病益甚不如通

聖散為愈服未盡劑而安

治風病者
宜三復此

張世魯子病驚風已十七日矣目右視而眨

音劄目
動也口

右張而動手足向右掣引舌上黑胎勢甚危急令急
取薄荷濃煎湯洗其舌謂之曰若黑胎去而舌紅則
病可治否則不可治也洗之黑胎盡去以瀉青湯作
大劑服之口眼俱定手口不掣以涼驚丸至聖保命
丹調理十日而安

聞氏子六歲病驚風延萬至則悶死治凶具矣視其形

色未變與神仙太乙丹半粒它口灌之並蘇

方見
燕門

留都金二守女患驚風甚危諸醫皆勿救自用活絡丹

一丸即愈

外科
蘆揮

陳三農治一小兒急驚雙眸突出舌吐三寸角弓反張

兒科望而却走曰此風火相扇風痰上涌而然用稀

涎散薺汁調服吐痰涎數目舌俱收後三日復如前

症以腸胃膠痰尚在下也以神效九薑湯化下去膠

痰二三升愈

魯世榮治總管楊侯幼子四歲臈月得患驚風搐掣諸
醫調治前症俱解但神昏不食四肢微冷已五日矣
前醫用醒脾治陽之藥不一而召魯診六脉獨脾脉
沉滑餘脉微緩脾脉沈而滑者此積蘊在脾乃為脾
約當主大便秘不利非陰厥也彼曰然遂用瀉黃散加
大黃水煎併三服大補一陰厥也神氣清而飲食進
隨獲安 此隆冬用大黃之功也用藥如用兵當用

豈容自己如五月渡瀘雪夜平蔡何待秋高馬肥而後為之若拘以四時取用則兵藥無成功矣

幼幼心書

大德戊戌夏曾因幹出郭至五里外有夫婦二人抱子而哭於道旁問之答曰入城探親三歲孩兒忽得驚風不省人事觀其面色青黯目閉神昏診之六脉全無按太衝脉沈而微有曾顧謂曰母慮此子可救且左右竟無人家遂於路側拾得破碗半邊有薑小塊細嚼捻汁碗中用五苓散蘇合香丸寬氣飲澆水調

和灌下十數次漸覺氣回聲出目開自此蘇

同上

衡州同知胡省齋因其子驚風曾治之愈問曰五苓散

何以愈斯疾乎曰此劑內用茯苓可以安心神用澤

瀉導小便小腸利而心氣通木得桂而枯以抑肝氣

而風止故多主驚風施之他症又有說胡深然之

同上

薛立齋治舉人杜克宏子發熱抽搐口噤痰涌此肝膽

經實火之症即急驚風也先用瀉青丸一服又用六

味丸二服諸症頓退乃以小柴胡湯加芎歸山梔釣

藤而安却用補中益氣湯而愈

冬官朱小溪子項間結核面色痿黃肌體消瘦咬牙抽搐頭搖目眈此肝木剋脾土也用六君子湯九味蘆薈丸治之而愈

儒者王文遠子患瘰癧痰盛發搐服金石香燥之藥手足筋攣此肝血復傷而致急驚風也遂用加味小柴胡加鈎藤山梔芎歸一劑又以六味丸料加五味麥冬煎服而安

奚氏女六歲忽然發驚目動咬牙或睡中驚搐痰涎涌
盛乃肝木剋制脾土不能攝涎而上涌也當滋腎水
生肝血則風自去而痰自消矣遂用六味丸而愈

薛鎧

立齋父

治一小兒七歲患急驚將愈而發熱驚悸或

用祛風化痰之劑更加驚搐吐痰喘嗽腹膨少食惡
寒又用抱龍丸等更加大便秘似痢寒熱往來殊類風
症視之以為脾氣虧損諸經無所資養而然用四君
子湯少用升麻柴胡以升補陽氣而愈

萬密齋曰一小兒驚風後右手強硬五指拳曲不能舉
物兼口角流涎語言蹇澀此脾有濕痰脾不足而肝
木乘之不可治也

陳自明治一小兒昏憤六日不省一小兒驚風發搐諸
藥不效手足尚溫謂其父母曰吾能活之與之針涌
泉二穴足心良久而甦喜而稱謝萬曰此病得之傷
食宿食成痰痰壅作搐今病雖愈宿痰未去恐他日
再作當制丸藥以除其根不然神氣漸昏必成癰也

乃謂為牟利不信次年八月果成疾迷之病二便不知水火不避復求治因制一方以黃連山梔瀉其浮越之火膽星白附子炮以去其壅積之痰茯神遠志石菖蒲硃砂以安其神麝香以利其心竅用獐猪心中血和神麴糊為丸如黍米大燈心湯下調理半年不復發矣又與之灸風池

腦後風府兩旁

曲池

兩肘外曲處

三里

曲池之下

六穴而安

因驚風成痼

龔子才治一兒癰癰啼叫額間青黑此驚風肝木乘脾

腹中作痛也先用六君子湯加木香柴胡鈎藤鈎啼
叫漸緩更加當歸二劑而安

一小兒沈困發熱驚搐不乳視其脉紋如亂魚骨此風
熱急驚之症也先用抱龍丸少許祛風化痰後用六
君子湯加柴胡壯脾平肝遂熱退驚定而愈

周必大二老堂雜志云開元錢最治小兒急驚以水磨
服少許神效余意小兒心受熱而發驚肝生風而發
搐蓋木邪侮土用金制木之義耳似亦有理

續醫說

高鼓峰治呂坦人子生甫數月忽急驚風抽搐直視發熱不乳醫以抱龍丸及羌活防風薄荷僵蠶等作煎調服坦人商於高高曰誤矣此脾土虛而肝木盛也急用五味異功散補脾加煨薑制肝進之少頃熟睡微汗熱退而乳

馮楚瞻治黃氏兒甫五月忽發抽搐竄引角弓反張一夜五次發則二便併出額汗如雨勢甚危篤馮視之亡陽之勢俱備矣詢其由因常生重舌屢服五福化

毒丹服後必瀉數次即愈蓋陽虛肆進苦寒脾傷下
元虧極肝木無養挾火上乘脾土益傷虛風乃發以
人參白朮各一錢熟附四分煎服服後安然靜睡下
午復發隨服隨安數劑而愈

吳孚先治一小兒吐瀉後失於調治忽痰涎上涌面色
青白似搐不搐右手脉沈遲而弱關紋隱隱手足尖
微冷此慢驚也不速治即成慢脾莫救用白朮人參
甘草黃芪半夏炒冬瓜仁炮薑製附而安

龔子才治一兒目內色青發搐目上視叫哭不已或用
牛黃清心丸不愈反咬牙頓悶小便自遺此肝經血
虛甚故耳用補中益氣湯及六味丸而瘥

一小兒潮熱手足發搐痰涎上涌手足指冷左腮自申
酉時青中隱白此肝經虛弱肺金所勝而潮搐脾土
虛弱而足冷也用補中益氣湯以補脾肺六味丸以
治肝腎而愈蓋病氣有餘當認為元氣不足若用瀉
金伐肝清熱化痰則誤矣

一小兒嘔吐不食手足搐搦痰涎上涌手足指冷額黑唇青此腎水勝心火也用五味異功散加木香炮薑頓安乃去炮薑再劑而愈

立齋治太平王職坊子患瘧疾恪用化痰之劑虛症悉至殊類驚風曰小便頻數肝經陰虛也兩目連眵肝經風熱也作嘔懶食胃氣虛弱也泄瀉後重脾氣虛弱也用補中益氣湯六味地黃丸而痊 劉應昌子患瘰癧恪用化痰之劑致與前症同亦用二方而愈

汪表聖次子兩歲偶感風邪發熱身顫角弓反張日服

此藥

蓋驚風金石
風痰之品

及羌防膽星全蠍之品昏沈欲絕

蓋不知小兒氣血未壯不耐風寒纔犯之即發痙病
但助其氣血即風除神爽一用此等藥治則風門大
開榮衛無主舊病未去新病益增安望生理予與五
味異功散加柴胡二分桂枝一分附子一分連服二

劑而瘥

慈幼筏
喻嘉言之論同

小兒慢驚

孫文垣治姪孫女周歲發慢驚眼開手拳目不動移脚
指微動自顙門後遍身如火喉中痰聲口中痰沫腹
脹下氣大便亦行先以牛黃丸蘇合丸進之不效後
與藥皆從痰沫流出通關散吹鼻無嚏自申至戌不
醒面色素青白氣稟甚弱因婢女抱之失跌受驚發
熱此驚氣乘虛而入在法不治姑以人參三錢薑汁
拌炒煎湯頻頻用匙挑入口中初三四匙皆不受又
與五六匙得一二匙下咽便覺痰聲少緩因頻頻與

之喉中氣轉目能動再以六君子湯加天麻石菖蒲
僵蠶澤瀉薄荷煎服乃畧啼吮乳次日咳嗽語聲不
出小水短少以辰砂益元散一錢燈心湯調下熱退
聲出改以四君子加陳皮五味麥冬桑白皮桔梗杏
仁薄荷一帖全愈

王叔權云澧陽有士人之子驚風後頂腫諸藥治之不
效舉家驚惶至十分危急忽遇友人薦一醫士素無
名稱者至則以半夏南星為細末新水調傅不至一

時而其腫消人異而問之曰此古方也又此症若灸則宜灸前項等穴

資生經

葉弘士之子歲半慢驚服金藥及風痰之劑昏悶七日指紋直抵三關醫辭不治予投以加減補脾湯立愈

慈幼筏

搐搦

陳文中治尚書洪端明子始生未及三個月腹脹滿足肚冷顙門高急上氣涎潮四肢搐搦同坐衆官皆言

死症洪公曰我在前死了七八個兒子皆是這般症候此兒子足見難醫枉廢生受亦不召醫視之或告陳因往視而謂之曰小官人此症候不死尚可救活運使曰此兒必死母勞用計衆官聞文中之言皆喜遂從旁勸曰陳君高明既有救療之心豈無起死之策從其言而治之以觀效否何如運使從說乃用油珠膏一服次用長生丸一服便下黃稠粘涎約半盞內有白妳塊如小豆大十餘塊是風痰結聚乳妳一

併便下後用前胡厚朴散加附子兩片二服而愈

源病

方論

淮西戴運使小娘子始生周歲腹中氣響痰涎壅閉手足抽掣欲與芎蠋散斡取痰涎運使曰兒子小難依此施治陳曰前制參劉菊坡小兒始生五個月因作搐乃服芎蠋散斡去痰涎次服油珠膏即愈菊坡贈一跋於卷末今運使小娘子因驚嚇畜冷氣於喉厭間傳入肝膽其氣上不能升下不能降血氣不能流

轉故痰涎壅閉而作搐也若不依此施治必不起遂以芎蠟散一服用手法斡去喉厭寒痰約半盞次用油珠膏二服後用補脾益真湯三服再用前胡厚朴散長生丸各二服而愈

同上

小兒發搐

即癰癰

萬密齋治一小兒二歲發搐已死家人痛哭乃阻之曰此兒面色未脫手足未冷乃氣結痰涌而悶絕非真死也取艾作小炷灸兩手中衝穴火方及肉而醒大

哭父母皆喜遂用家傳治驚方以雄黃解毒丸十五
九利其痰涼驚丸二十五丸去其熱合之煎薄荷湯
送下須臾利下黃涎搐止矣

一兒發搐痰涌有醫用白餅子下之不退凡三下病益
深合目昏睡不哭不乳喉中氣鳴上氣喘促大便時
下萬曰五臟氣絕不可治轉下之過也彼醫曰白餅
子錢氏下痰神方也萬曰盡信書不如無書錢氏小
兒皆出於門人附會之事也

虞天民謂錢乙書出於
門人閻孝忠所集非錢

氏本意

也蓋人之有疾猶木之有津時令大熱草木流
津痰自熱生此明驗也痰猶水也附氣自行過額在
山豈水之性哉乃博激使之也今痰隨火上不知降
火而反下之損其胃氣胃氣既敗五臟俱損故目不
開者肝絕也昏睡不語脾絕也啼聲不出者心絕也
喘促痰響者肺絕也便尿遺失者腎絕也果不可治
而死

一小兒周歲發熱而搐以瀉青丸投之不效乃問其發

搖之狀其母曰搖過後只好睡以乳與之則飲不與則不思醒時則戲作貓兒聲見人則笑不發搖便是好了萬曰醫要識症藥要對症怪底前藥之不效也以導赤散服之一劑而安其父問故曰心臟屬火其聲為笑火生於寅屬虎貓者虎之類也貓聲而笑知非肝病乃心病也故以導赤散瀉其心火而安

一兒發搖五日不醒藥石難入萬針其三里合谷人中而醒父母喜曰吾兒未出痘疹願結拜為父乞調養

之萬曰曩用針時針下無氣此稟賦不足也如調理數年後出痘可保無事若在近年不敢許次年果以痘疹死

張子和治李一小兒病手足搐搦張曰心火盛也勿持其手當聽之此由乳母保抱太極所致乃令婦淨地以水洒之水既乾令復洒之令極濕俛卧兒於地上良久渾身轉側泥浣皆滿仍以水洗之少頃而瘥子和曰小兒風熱驚搐乃常病也當搦時切戒把捉手

足握持太急必半身不遂也氣血偏勝必痺其一臂
漸成細瘦至老難治當其搐時置一竹簞鋪之涼地
使兒寢其上待其搐風力行徧經絡茂極自止不至
傷人

予嘗診一兒見其左掌拳曲詢其由乃小時患驚
搐為母抱持太急病愈手遂不能伸舒按此症若
初得以大劑肝腎陰劑與之必能伸舒如故惜世
無知者

葛茂林治少師楊公子當暑而驚眩已絕且移之木矣
葛趨而入曰無傷也亟出之公曰兒已噤矣奈何劑
也葛曰子無劑也所恃者天上雲耳雲生而淒淒欲
雨陰氣舒而陽鬱消吾以清利物煮水而蒸於下其
可瘳乎果如其法而疾愈迨至日暮則其子已戲於

庭矣

杭州府志

一兒發搐先取善推法推之止向後發病益危甚萬曰
推法者乃針灸按摩之遺意也經曰無刺大虛人推

搗之法壯實者可用之如怯弱者其氣不行推則有汗反傷元氣也其家不信萬曰不死必成癰半月後果死

一兒發搐因用推法萬曰病成癰矣可奈何蓋壯實之兒可用之若怯弱者其氣反不行矣推法者乃發表之意痰聚在心不得出也幸初成癰當可治若久則為終身錮疾不可治也立方用黃連五錢硃砂二錢五分白甘遂三分膽星一錢為末米糊為丸攢猪心

血杵勻丸芡實大每服一丸燈草煎湯化下夜服三
日服一遂安

一兒發搐醫以二陳湯薑汁竹瀝治之不效萬視其外
侯三關青氣兩頰赤色目常直視指如撚物曰此得
之外感未與發散熱入於裏錢氏曰肝有熱則目直
視得心熱則發搐又曰兩頰赤而目直視必作驚風
小兒肝常有餘又乘木旺之時當與瀉肝若二陳湯
陳皮半夏生薑之辛皆助肝之物經曰以辛補之所

以無效乃用瀉青丸瀉肝木之有餘導赤散以瀉心之火一服而搐即止因其胎稟素怯脾胃且弱恐後作搐便成癇疾人與琥珀丸常服而安

邑中有儒醫治病多良方惟性太執不知變通時有兩小兒發搐萬謂急驚當用涼瀉導赤散瀉青丸是也彼謂驚風者肝火鬱遏而成火鬱則發之論極是小續

命湯是也方大人從而兩治之萬治者生彼治者死

薛立齋治一小兒三歲因驚搐搦發熱痰盛久服抱龍

九等藥反致面色或赤或青此心肝二經血虛風熱
生痰不足之象也用六味九滋腎生肝血用六君柴
胡升麻調補脾胃而安

高鼓峰治徐彥為子甫四歲盛夏發熱驚搐不已腰曲
目直小便短赤面無神色醫作傷寒不應高視之曰
火燥生風風淫末疾非傷寒也用滋水清肝飲盡一
劑而汗解便利熱退高曰瘧至矣立用五味異功散

補加麥冬五味

生脉清暑

十餘劑而愈

陸肖愚治鞠氏子年十一向因水土不便泄瀉瘦弱四月終旬蒸熱淫雨忽患頭面大腫手足身體亦微腫或謂風熱與蘇葉羌防升麻柴葛等汗大洩既而痰涌吐逆語言不倫身強直手足振掉又謂急驚風用抱龍鎮心等丸不效脉之浮緩而弱此因脾虛土不勝水值濕氣盛行內濕與外濕相感而作腫治宜健脾滲濕乃反發汗致升動其臟腑之痰涎漏洩其經絡之津液宜其變症若此也因用六君子湯加歸芍

投之一劑而吐止數劑而僵直振掉除又數劑精神復加澤瀉倍茯苓數十劑而腫消瀉止

薛立齋治憲幕顧斐齋元孫二周項結核兩臂反張素敗毒果係前症遂與六味丸一服侵晨灌之午後肢體如常

一兒兩目眨動手足發搐數服天麻防風丸之類以祛風化痰前症不愈其痰益甚得飲食諸症稍愈視其準頭及左頰色青黃曰脾主涎此肝木制脾土不能

統攝其涎非痰盛也遂用六君子湯加升麻柴胡鉤
藤二劑飲食漸進諸症漸愈又用補中益氣而安

萬密齋治一小兒痰壅發搐氣促而喘用礞石滾痰丸
桑白皮煎湯碾碎調服之喘定痰下搐亦止矣

一小兒七月發搐無時昏睡不醒不哭不乳搐之劄之
不痛搐之鼻不嚏灌藥不入曰此真搐也不可治矣

密齋父治一兒滿月後發搐以至聖保命丹治之而安

小兒慢脾風

喻嘉言治門人王生表兄沙無翼之子縱啖生硬冷物
一夕吐食暴僵不省人事醫以驚風藥治之渾身壯
熱面若裝硃眼弔唇掀下利沾污診畢謂曰此慢脾
風候也脾氣素傷更以金石藥重傷今已將絕故顯
若干危症須用起死回生之法解盡前藥復用補劑
庶可挽回但非一朝夕之功須七日方醒恐信不篤
而更醫無識反得謗罪生謗王生堅請監督其家且
以代勞且以壯膽於是用烏鰒四君子湯每日灌一

大劑每劑用人參一錢渠家雖暗慌然見面亦退而色轉明潤便瀉止而動移輕活似有欲言不言之意亦自隱忍至第六晚忽覺手足不寧揭去衣被始極詆人參之害王生先自張皇任其轉請他醫纔用牛黃少許從前危症復出面上一團死氣但大便不瀉耳重服理脾藥又五日方甦

楊乘六治孫氏子慢脾症痰涎涌盛咳嗽身熱抽搐自汗嗜卧露睛撮空手振屢進補脾逐風消痰之劑不

應楊曰此症風自內出本無可逐痰因虛動亦不必
消只補脾土諸症自退今面白脂散舌滑白天柱已
倒虛上加寒非炮薑桂附何以追已去之陽而甦垂
絕之氣哉乃寫參附養榮方與之且囑之曰如以稚
幼純陽無補陽之法無挽回矣一劑症減三劑全除
次用五味異功散加煨薑白芍而痊

薛立齋云一小兒常患停滯數服剋伐消導之劑以致
脾胃虛甚患吐瀉慢脾風而卒

萬密齋治一兒脾胃素弱病瀉以理中丸服之瀉未止
口内生瘡或謂前藥性熱助火復以冷藥投之身微
熱睡則揚睛曰此慢脾風矣脾胃本虛瀉則益虛口
中生瘡者脾虛熱也誤服冷藥則中氣益損昏睡不
乳虛損之極也當急作調元湯倍加人參服之調理
半月而愈

馬銘鞠治華叔蟾乃郎慢脾風五六日愈愈甫三四日
即過乳食不進角弓反張二便秘有欲進以牛黃

九者曰下咽死矣此病後虛症也然參且勿用用麥
冬三錢枇杷葉三片貝母二錢半桑皮錢半杏仁一
錢藿香一錢鮮糖球一枚蒼朮人乳炒八分橘紅一
錢二分加燈心煎入薑汁服逾時小便隨利即腹寬
諸症悉退盡劑竟愈

廣筆
記

小兒風前

萬密齋治汪前川子年四歲七月病驚搐醫以拿法搗
止之八月連發二次仍用搗法九月又發萬曰痰聚

成驚驚久成癩。幼科拿法即古之按摩法也。病在營衛者可用之。使營衛之氣行亦發散之意。病在臟腑則不能去矣。久則痰塞心竅不亟治必成痼疾。古所謂五癰者自此得之。因立方以黃連瀉心中之邪熱。為君枳實半夏去胸中之積痰。為臣硃砂寒水石之。墜以安其神。為佐甘遂逐上焦之痰。飲麝香以利竅。為使神麴作糊丸如龍眼大。每服一丸用獐猪心銅刀批開納丸其中。縛煮待心熟取丸和心服之并飲。

其湯名曰斷癇九服猪心五個乃愈

陳氏子二歲病驚風失治成癇少月一發來求藥萬用

六一散未分三色

巧於點染

一色青黛相和名安魂散

青入

肝肝藏魂

寅卯時

屬木

竹葉煎湯下一色硃砂相和名寧神

散

赤入心藏神

巳午時

屬火

燈心煎湯下一色入輕粉少許

名定魄散

白入肺藏魄

申酉時

屬金

薄荷煎湯下調理半年

而安大凡癇病初得之者十療八九如過二三年後者不可治矣時醫有用吐法者有用滾痰丸下之者

徒損胃氣百無一效有以壽星丸治者一杯之水豈能滅車薪之火哉

萬壻李中菴九歲時得癩病常昏仆口眼俱合手足不動喉無痰聲但僵卧如醉人知其為心病也乃用東垣安神丸去地黃加茯神遠志石菖蒲以通其心竅南星珍珠末鐵華粉以墜其痰湯浸蒸餅丸如黍米大

上

凡用鎮墜藥及治上焦病者丸皆宜

細燈心湯下調治一年而愈

萬之季男七八歲時得癩病發則面先青慘目定口中

有痰如嚼物狀昏仆一食頃乃甦因教其母但見面
青目定時即以鷺翎探吐其痰亦是如法而行前後
吐痰二升許癰竟不發如此調理三年而安大抵癰
病皆痰也雖有五獸之名猪羊雞犬牛是也巢氏之
說後人多非之各隨其臆詳見錢氏方中凡氣實者
控涎丹氣虛者斷癰丸愈後以琥珀抱龍丹調之未
有不安者但年深者不可治也

薛立齋治一小兒患驚癰吐痰困倦半餉而甦諸藥不

效年至十三而頻發用肥厚紫河車生研爛入人參
當歸末搗丸桐子大每服三十五丸日進三五服乳
化下一月漸愈又佐以八珍湯全愈

一兒七歲發驚癇令其恣食人乳後發漸疎而輕至十
四復發用乳不效亦用河車丸數具而愈常用加減
八味丸而安後至二十三歲復發而手足厥冷仍用
前法佐以八味丸十全大補湯而痊又治數小兒皆
以補中益氣湯六君子湯六味八味等丸相間用之

皆得全愈

馮楚瞻治汪氏兒九歲因驚癇屢發抽掣語言不清勢甚危篤脉之堅強久按無力詢其由痘後跣足行走忽脚面浮腫疑為草露之毒服清涼解毒數劑漸腫至腿又服五子五皮飲數劑忽一日僵仆卒倒乃成驚癇之疾曰此痘後氣血大虛所以脚腫誤服清涼乃腫至腿復加滲利削伐致虛火上乘無故卒倒猶大人中風症也惟宜峻補氣血佐以舒筋活絡之藥

乃用當歸白朮芍藥天麻熟地茯苓牛膝銀花秦
芫熟附子之類三四劑後其勢稍緩以前方沖人參
湯調理一月而安

萬密齋治一兒四歲病驚已絕針其涌泉穴而醒自後
不發謂曰未服豁痰之藥恐發癇也不信未半年似
痰迷飲食便溺皆不知時復昏倒果成癇矣問其發
時能自知乎曰欲昏則發乃與錢氏安神丸加膽草
服之教其父曰病將發時急掐兩手合谷如此調理

一月而安

一小兒十歲餘得癩疾診之兩目渾白無有睛光語言
蹇澹舉動癡迷辭不可治另延醫治之竟無成功

黃州守萬魯庵子病癩見其容貌俊偉性格聰明謂曰
可治乃與琥珀抱龍丸方使自製服之

續名醫類案卷四十四

欽定四庫全書

續名醫類案卷四十五

錢塘魏之琇撰

小兒發熱

張子和治高巡檢之子八歲病熱醫者皆謂傷冷以熱藥攻矣欲飲水禁而不與內水涸竭煩躁轉生前後皆閉口鼻俱乾寒熱往來咳嗽時作遍身無汗又欲灸之張責其母曰重裯厚被暖炕紅爐兒已不勝其

熱矣尚可灸乎先令服人參柴胡飲子連進數服下
爛魚腸之類臭氣異常渴欲飲水聽其所欲冰雪涼
水連進數杯節次又下三四十行大熱方去入與牛
黃通膈丸復下十餘行兒方大痊前後約五十餘行
畧無所困冰雪水飲至一斛向灸之當何如哉

呂東莊治吳尹明子十歲患夜熱二年餘頷下忽腫硬
如石面黃時時鼻衄如注脉之沈鬱之氣獨見陽關

曰病敦阜也

右關主脾胃沈鬱乃實熱症敦阜字從示人以不易知也

用石膏藿

香葉梔子防風黃連甘草等領腫漸軟面黃復正繼
用黃芩枇杷葉元參枳殼山梔茵陳石斛天麥門冬
生熟地黃等

甘露
飲也

重加黃連而衄血夜熱悉除

陸養愚治李邑宰子年十一於六月夜間忽發熱微汗
頭微痛或謂傷暑與香薷飲冷服病更甚且增喘嗽
痰入謂脉氣浮數火熱上炎以苓連知母花粉清之
喘咳不絕飲食不思睡卧不安脉之弦緊左倍於右
面赤戴陽此風寒外束宜發散之或謂如此炎天且

身常有汗何以宜表曰症因風寒傷其衛陽之氣令
外之陽氣拒而不得入故汗微微而不止內之陽氣
伏而不得出故身翕翕而壯熱若解散其邪則外者
得入內者得出自汗身涼矣用乾葛為君蘇葉防風
為臣前胡白芷川芎為佐桔梗杏仁甘草為使熱服
微覆汗大泄少頃喘嗽壯熱頓盛二劑全愈

薛立齋治儒者薛衡甫子年七歲身弱羸發熱面黃皆
以為內傷瘀血欲下之謂乃脾臟受傷投以六君子

湯加煨薑兩服飲食頓進數服諸症全愈

萬密齋治一兒發熱日晡尤甚或作瘧作潮熱治俱不效曰此胃虛有宿食也謂瘧疾則寒熱有發有止謂潮熱則發有時如水之潮過即退次日依時再發此兒身嘗溫熱至申酉時故知是宿食發熱也或曰有所據乎曰出仲景傷寒正理論陽明病證云潮熱者實也宜下之以三化丸下之而愈

一兒驚風時熱不退有議用小柴胡湯有欲用竹葉湯

者有欲涼驚凡者曰大驚之後脾胃已虛宜溫補之
三方寒涼不可用也乃與理中湯用炒乾薑一劑熱
除

三府張公子初冬三日發熱又二日熱益甚且上直視
口多妄言或作風治無效至二十七日診之曰病勢
將退但肺熱未除耳問何故曰三關黃潤兩目精明
此病當愈也惟正而戴陽喘氣上息此肺虛熱耳與
小阿膠散咸阻之卒不聽一劑喘止熱退欲食而安

小兒發熱

萬密齋治黃學儀子病熱不退先君治之已八日不效

全叩之

全密齋名

曰日夜發熱小便赤大便難再叩藥曰

先與胃苓丸

庸手

今與涼驚丸全曰不效矣先君曰汝

能已此病乎全對曰此名風熱乃肝病宜用瀉青丸

熱即退矣黃氏相招即令全往如法治之五日而愈

然今之小兒則宜養育矣

余氏子病熱諸醫汗之下之和解之皆不效以虛熱也

用調元湯加炒乾薑未盡劑而熱除

密齋長男幼多疾一日病瘧後潮熱日益瘦先父母憂之全曰此疳熱也用小柴胡加鱉甲當歸川芎陳皮青皮為丸服之愈

馮楚瞻治李氏兒八歲病熱旬餘發散和解苦寒之劑備嘗無效勢日危篤診之形肉枯槁牙齒堆垢厚而焦黑唇舌燥烈耳聾目盲遍身疼痛壯熱無汗譫語煩躁脈之沈微欲脫陰寒之候也此釜底無火鍋蓋

乾燥之象上之假熱由於下之虛也乃重用人參熟地
少加附子壯水益火服後熱退夜半思食次日其脈
更虛但神氣少清爽乃倍進前藥三四劑後漸瘳不
十劑全愈

姜居安治一貴官攜家過沛抵沙河稚子病居安告之
曰請勿驚但得沙一斗疾即愈官如其指布沙舟中
令兒卧其上久之兒手足能動不數時而疾良已貴
官問故曰小兒純陽當春月而衣被皆湖綿過於熱

故得涼氣而解

江南
通志

馮楚瞻治洪氏兒未及一週時當暑月壯熱多日神氣困倦唇舌焦燥飲乳作嘔五心亦熱如烙脈洪數而弦醫與發散消導數劑復疑麻疹更為托表馮曰久熱傷陰陰已竭矣復加托表陽外越矣若不急為斂納何以續陰陽於垂絕哉乃用熟地四錢麥冬一錢五分牛膝一錢二分五味子二分製附子四分一劑熱退次日加炒黃白朮一錢六分另煎人參沖服而愈

張景岳仲男生於五月於本年初秋忽感寒發熱脈微
緊然素知其臟氣屬陰不敢清解遂與芎蘇羌芷細
辛生薑之屬冀散其寒一劑熱不退反大瀉二日不
止繼之喘愈瀉則愈喘見其表裡俱劇乃用人參二
錢生薑五片煎汁半盞未敢驟進恐加喘也與二三
茶匙呼吸仍舊又與三四匙息稍舒遂與半小鐘覺
有應遂自午及酉完此劑適一醫至曰誤矣馬有大
喘可用參者速宜抱龍丸解之但唯唯仍用人參二

錢五分如前煎湯自酉至子盡其劑氣息遂平酣睡
瀉止而熱亦退矣所以知其然者觀其自瀉反喘豈
非中虛設有實邪自當喘隨瀉減向使易以清利中
氣脫而死矣必反咎用參之悞也孰是孰非何從辨
哉此醫之所以難為而易為也因紀此以見溫中散寒之功其妙
有如此者

按是症或是小兒變蒸之熱悞用峻表傷其元氣
以致喘利幸仗獨參挽回後之所云亦過後詳籤

耳

一兒感冷惡寒大熱用發表藥則汗出熱退過一二日復熱大便秘必裡未解也服四順清涼飲利一行熱退隔日又熱小便赤服導赤飲熱退過三日又熱庸劣者幾無措手矣診其脈脈已和既發汗又利大小便其兒已虛陽氣無所歸皆見於表所以熱以六神散和其胃氣加烏梅一枚令微有酸味收其陽氣歸

內自此全愈

無名氏
沈手抄

又一兒有積熱表裡俱熱頰赤口乾小便赤大便焦黃
用四順飲利動藏府熱乃去既而復熱裡解而表未
解也發散微汗熱乃去隔日又熱此無他表裡俱虛
氣不歸元而陽浮於外所以再熱實非熱症也只以
六神散入粳米煎和其胃氣則陽氣歸內身體自涼

同上 二案
表裡變化

嘔吐

萬密齋治教諭熊文村子二歲病嘔吐更數醫不效食

飲入口即吐出萬視之曰病可治也問用何方曰理中湯曰服多劑矣不效奈何曰此在內經乃陰盛格陽之病寒因熱用熱因寒用伏其所王先其所因則效矣乃作一劑取獺猪膽汁童便各半和藥炒乾煎而服之

即仲景白通湯入人尿猪膽汁之法

吐立止後稱渴以湯飲之

復作吐萬曰凡嘔家多渴者胃脘之津液乾也當得一二時吐止胃氣立津液生渴自止矣令將前藥查再煎服之仍禁其飲食半日而安熊問同是理中湯

前用之不效今用之而效何也曰公子胃寒而吐當以熱藥治之乃寒盛於中投之熱劑兩情不得故不效也今以理中為治寒之主用猪膽汁之苦寒小便之鹹寒為佐以從其格拒之寒藥下於咽而寒相得入於胃陰體漸弱陽性乃發其始則同其終則異故曰伏其所王先其所因也此軒岐之秘旨啟元子之奧義張長沙之良法也後王民肅子半歲嘔吐不納乳昏睡仰卧而努其身有作慢風之候亦以理中末

三分用水一杯煎至半杯入膽汁童便各一匙攪勻徐徐灌之而瘥

鄭氏女患嘔吐萬視其症乃傷食吐乳也家人云無乃用理中湯去甘草加丁香藿香不效又作膽汁童便法亦不效四日後吐出飯半碗詢其家人曰此兒數日不食何得有此始吾言傷食汝固云無故治不見效遂取脾積丸投之取下惡糞如靛乃五日前所食雞子黃也所吐之飯即其時所食也壅塞腸胃格拒

飲食所以作吐下之即愈

一兒自滿月後常吐乳父母憂之諸醫不能止一日問
萬萬曰嘔吐者非常有之病也今常吐乳非病也然
小兒賴乳以生頻吐非所宜也其間有母氣壯乳多
縱兒飽足飽則傷胃所食之乳涌而出此名溢乳如
瓶之注水滿而溢也宜損節之更服肥兒丸兒之初
生筋骨軟弱為乳母者常懷抱護持可也不然則左
右傾側其乳流出此名吮乳如瓶之側其水流出也

能緊護持則不吐也有胃弱者不能受乳以變化之
吐出無時所吐不多此名哺露如瓶之漏不能容受
也當補其脾胃助其變化可也亦以肥兒丸主治自
愈

龔子才治小兒傷食嘔吐服剋伐之藥嘔中見血用清
熱涼血之藥又大便下血唇色白而或青問其故龔
曰此脾土虧損肝木所乘而然也令空心用補中益
氣湯食遠用異功散以調補中氣使涎血各歸其源

而愈

薛立齋治一小兒每飲食失節或外驚所忤即吐瀉發
搐服鎮驚化痰等藥而愈後發搐益甚飲食不進雖
參朮之劑到口即嘔乃用白朮和土炒黃用米泔煎
數沸不時灌半匙仍嘔次日灌之微嘔再日灌之欲
嘔此後每服二三匙漸加至半杯不嘔乃濃煎服而
愈

一小兒停食服通利之劑作嘔腹脹此脾胃復傷也用

補中益氣湯而愈

萬密齋治一兒初生即吐或欲用錢氏木瓜丸曰不可
小兒初生胃氣甚微或有乳多過飽而吐者當緩緩
與之或因浴時客寒犯胃而吐者當用乳汁一杯用
薑蔥同煎少與服之或因惡露涉水停在腹中而吐
者宜以炙草煎湯而吐去之奈何用木瓜丸以鐵粉
檳榔之重劑犯其胃中初生中和之氣耶故常語人
曰錢氏小兒方非先生親筆乃門人附會之說也

大還治一小兒生方九日即嘔吐腹脹作脾氣虛寒用
半夏陳皮薑汁荀子丁香藿香砂仁各少許煎飲半
酒盞而安

小兒泄瀉

有小兒病虛滑食畧化大便十餘次四肢柴瘦腹大食
訖又饑此疾正是大腸遺熱於胃善食而瘦又謂之
食飢者時五六月間脈洪大按之則絕今六脈既單
洪則夏之氣獨然按之絕則無胃氣也經曰夏脈洪

洪多胃氣少曰病但洪無胃氣曰死夏以胃氣為本

治療過於失時不逾旬果卒

衍義

滑伯仁治故元望女生始六月病泄瀉不已與灸百會
穴即愈

滁州趙使君云其女年甫周歲忽苦臟腑每所下如雞
子黃者半盆許數日之間幾至百遍漸作驚風症有
一士大夫教以鐘乳粉二錢以棗肉和搜令取意食
之不然以濃煎棗湯調鍾乳服亦可以小兒只用一

錢已平復矣傳方者云他日或作少瘡瘍不足慮兒
子清老年三歲過鎮江時病久瀉危甚用此法服至
半兩遂安亦不生瘡

是齋方

小兒

泄瀉

萬密齋治孫監司女五歲病瀉諸治不效萬視之曰瀉
久傷陰津液不足故熱發而渴也渴飲湯水多則脾
受濕而瀉益不止腎益燥而渴轉甚法當專補脾胃
則瀉渴止而津液生熱自除矣用白朮散作大劑煎

湯戒勿飲水以湯代之未半日進兩劑因思肺為津液之主肺金大燥不能生水故渴不止乃加法製天花粉葛根等分只一服其夜渴減瀉亦少次日仍用前方渴瀉俱止問何不用仍服白朮散萬因以已意告之後誤啖菱病喘而面目浮腫以錢氏異功散加藿香葉紫蘇一服而腫去喘止

胡三溪子多疾三歲病瀉諸治不效萬視之曰此傷食瀉也夫瀉有三症熱瀉者糞色黃而渴冷瀉者糞色

青而不渴食積瀉者糞酸臭而腹痛或渴或不渴此
子之疾所下酸臭乃積瀉也用丁香脾積丸一服而
愈三溪曰巴豆下積而止瀉何也曰本草云巴豆未
瀉者能令人瀉已瀉者能令人止積去瀉止自然之
理也

萬石泉子

此人亦是兒醫

病瀉自作理中訶子豆蔻與之不效

延萬治渠書一牛字安橈上蓋治愈當以牛為謝也
即以其字卜之牛下橫一橈乃生字也曰予到令郎

之病即愈矣與以陳氏肉豆蔻丸合胃苓丸車前草煎湯下一服而瀉止石泉欲再進一服曰腸胃嬌嫩不得已用藥中病即止不可過也越三日身發紅斑狀如錦紋石泉頗究心傷寒胃瀉後發斑與陽明症下之太早熱氣乘虛入胃之症同宜服化斑湯但石膏性寒瀉後脾虛恐不可用萬曰有是病則投是藥何不可者請用之未盡而斑沒身涼

胡東郊子一歲六月中病瀉治不效瀉下頻併黃白而

後重發熱而渴時天甚暑皮膚燥而無汗髮稀成穗
萬曰此熱瀉成府矣瀉下頻併後重者裡熱也糞黃
者脾熱之色也白者乳汁不化猶邪熱不殺穀也口
渴皮膚乾燥髮成穗者津液枯也乃用四物湯合黃
連香薷飲令乳母服之以解其暑毒初用四君子湯
調六一散與兒服之解其裡熱次用四君子湯合黃
芩芍藥湯以止其瀉三用白朮散以止其渴四用白
朮散加升麻以舉其下陷之氣五用白朮散加烏梅

肉以收其滑泄之氣皆不效其母託人相問萬曰五
法不中病術將窮矣只有一法以黃連木香訶子肉
豆蔻乾蟾使君子肉砂仁等分為末粟米糊丸陳倉
米炒熟煎湯下服三日滿頭出熱瘡乃小瘡身有微
汗渴瀉俱止

萬之子甫周歲六月病瀉時萬出外舅甘以藥調之不
效加以大熱而渴萬聞馳歸問所用何藥曰理中丸
因知其犯時禁也

用熱
遠熱

乃製玉露散澄水調服而愈

徐氏子歲半六月病瀉甘治之不效大熱大渴煩躁不安萬往視問何藥甘曰玉露散初服瀉已止因熱未除再與之復泄至今五日病益甚教用理中湯加熟附子治之如服下越加煩躁再進一劑即愈若不煩躁不可治也萬歸半日後甘攜酒來問前者甥病泄用理中丸不效師教以理中湯加熟附止之何也萬曰理中丸之止瀉補中氣之藥也玉露散之止瀉解暑毒之藥也前者甥之病汝用理中丸是也中

病即止不可再服因用之太過犯臟禁也脾喜溫而惡寒故以理中湯加熟附救之甘曰又謂理中湯後加煩躁者可治否則不可治何也曰夏至一陰生坤乃六月之卦易曰坤為陰內而陽外坤屬土喜暖而惡寒玉露散雖治暑瀉之藥其性寒過劑則脾土反傷陰盛於內陽脫於外吾見其兒面赤目張口開唇燥大熱大渴此陽脫症也故用理中熟附以扶陽抑陰不加煩躁則脾為死陰不可救矣若加煩躁則胃氣

猶存但藥不敵病而然再進一服則陽勝陰退而安矣

胡氏子夏月病瀉醫以理中理中氣五苓以利小便豆
蔻丸以止瀉皆不效萬視其發熱昏睡腸鳴而利水
穀不化曰此傷風泄瀉也經曰春傷於風夏生飧泄
飧泄者謂水穀不化也初病時宜用黃芩芍藥湯加
羌活防風發散之劑今病久中氣弱矣用建中湯加
白朮茯苓服三劑而愈

薛立齋治一小兒瀉而大便熱赤小便澀少此熱蘊於
內也先以四苓散加炒黃連一劑其熱稍退又用七
味白朮散去木香二劑熱渴頓止後以四君升麻調
理而痊

一兒九歲食炙燂之物作瀉飲冷諸藥不應肌體消瘦
飲食少思用黃連一兩酒炒焦為末入人參末四兩
粥丸小豆大每服四五丸不拘時白湯下服訖漸
愈又用五味異功散加升麻服月餘而痊後不禁厚

味復作飲冷服肥皂丸異功散而愈

龔子才治一兒久瀉兼脫肛小腹重墜四肢浮腫面色
痿黃時或兼青諸藥到口即吐審乳母憂鬱傷脾大
便不實先用補中益氣湯五味異功散及四神丸調
治其母不兩月子母俱痊

治兒病先察其
母極是要著

喻嘉言治沈氏子因痘後食物不節病瀉瀉久脾虛病
瘧遂爾腹痛脹大三年來消導無算脹瀉如初更服
參苓白朮稍效然亦弗瘳病本腹脹更兼腸癖腸癖

者大腸之氣空洞易走胃中傳下之物總不停畜滯
出無度腥水不臭十中五死五生之症也今則病加
四逆矣暮熱朝涼一逆也大渴引飲二逆也氣喘不
能仰睡三逆也多汗煩躁不寧四逆也蓋初瘧時寒
熱交作猶是陰陽互戰迨瀉久亡陰乃為夜熱至引
外水以自救醫不清其源重以香燥破氣之藥助火
劫陰於是喘汗煩躁並作治亦難矣強求用藥乃以
清燥潤肺為主阿膠地黃門冬等類同蜜熬膏三斤

此兒三年為藥苦得甘味稱為糖也日爭十餘次服之半月藥盡遂愈另製理脾末藥善後全安

馮楚瞻治一兒滑泄半載肌肉瘦削脾胃之藥備嘗無效此久利不已脾胃之中氣固虛而腎家之元更虛閉藏之司失職當不事脾而事腎可也以八味丸用人參炒老米同煎湯化服不一月全愈

張子和曰余嘗告陳敬之若小兒病緩急無藥不如不用庸醫宜湯浸蒸餅令軟丸作白丸給其妻妾以為

真藥使兒服之以聽天命最為上藥歲在丙戌羣兒
皆病泄瀉但用藥者多死蓋醫者不達濕熱之理以
溫燥行之故皆死惟敬之不與藥用余之言病兒獨
存

張三錫治一稚子久瀉以參苓白朮散加黃連豆蔻少
許作丸用燈心湯化下十數丸效

萬密齋曰一兒病瀉大渴不止醫與五苓散玉露散皆
不效病益困腮妍唇紅曰不可治也泄瀉大渴者水

去穀少津液不足故也法當用白朮散補其津液乃服
五苓玉露滲利之劑重亡津液脾胃轉虛訣云大渴
不止止而又渴者死泄瀉不止精神好者死不信三
日後發搐而死

汪城南子病瀉十餘日不止或以胃苓丸一粒丹服之
不效乃與豆蔻丸五十胃苓丸五十陳倉米煎湯下
一劑而止矣

小兒吐瀉

萬密齋治一小兒周歲吐瀉並作時天大寒醫用理中
胃苓丸服之不效萬曰此表裡有寒邪未得發散也
取益黃散與之其夜得大汗而止

一女歲半亦吐瀉並作此傷食也前有外感風邪故用
益黃散溫散其表裡之寒此只是傷食用胃苓丸一
粒丹陳壁土湯下調其脾胃消其食積而吐瀉俱止
一兒暴吐瀉上下所出皆乳不化用理中丸服之效一
兒暴吐瀉上下所出皆黃水中有乳片用二陳湯加

黃連薑汁炒煎服效或問二病同而治之異者何也
曰所出之乳不化者胃有寒也故以理中丸急溫之
所出乳片不化者胃有熱邪邪熱不殺穀宜半夏黃
連以解之此同病異治法也

張景岳季子生於燕地白露時甫半周偶感寒吐瀉大
作即用溫胃和脾之藥不效隨用理中等劑亦不效
三日後加人參三錢及薑桂吳茱萸肉豆蔻之類亦
不效至四五日則隨乳隨吐其半而瀉其半腹中毫

無所留矣不得已用人參五六錢製附薑桂各一二錢下咽即吐一滴不存而所下之乳白潔無氣猶是乳也其形氣之危已萬無生理度其寒氣犯胃舍參薑桂附之屬何以為治既乃悟蓋胃虛已極藥之氣味畧有不投則隨拒而出且附子味鹹亦能治嘔必其故也必得甘辣可口之藥庶胃氣可安乃用胡椒三錢搗碎煨薑一兩水二鍾煎八分另用人參二兩水二鍾煎一鍾以茶匙挑合二湯以配其味凡用參


湯之十加椒薑湯之一其味甘而辣正得可口之宜
遂溫置熱湯中徐徐挑與之經一時許皆咽下自後
乳藥皆安但瀉仍未止計半日已盡二兩之參矣參
盡後忽躁擾呻吟煩劇甚家人皆謂熱藥內燒所致
曰藥果不對何以初甚相安此必數日不食胃氣新
復倉廩空虛饑甚則然也取粥示之果張皇欲得其
狀甚急乃與一小盞一呷而盡又欲之遂與半碗猶
不足人與半碗始寂然安卧次日復加製附得瀉止

全愈原其受病之深用藥雖當氣味不投猶弗獲效
至其因饑發躁使非詳悟妄用清涼一劑則全功盡
棄而仍歸罪於用參薑者矣

薛立齋治一小兒數歲每停食輒服峻利之劑後患肚
腹膨脹或嘔吐泄瀉先用六君子湯諸症漸愈又用
補中益氣湯胃氣漸復

韶州醫者劉從周論小兒吐瀉發搐覺有痰者但服五
苓散入生薑半夏煎服吐了痰瀉亦止驚自退

百乙方



續名醫類案卷四十五